

- 1<sup>r</sup> Vil narren sint jn disem druck
- 2<sup>r</sup> Die doren sint / jnn manchem stuck
- 3<sup>r</sup> Den sitzt der esel vff den ruck



### Von gdruckten narren

- 1 So vil sint jn dem narren orden
- 2 Das ich schyer wer versessen worden
- 3 Vnd hett des schyffes mich versumbt
- 4 Hätt mir der esel nit gerumbt

5 Jch bin der den all ding dünt drucken  
 6 Will mich recht jnn winckel schmucken  
 7 Ob mich der esel wolt verlon  
 8 Vnd nit stâts vff mym rucken ston  
 9 Wann ich alleyn gdult dar zû hab  
 10 Hoff ich / des esels kumen ab  
 11 Doch hab ich sunst vil gsellen gût  
 12 Die druckt als das mich drucken dût  
 13 Als der nit volget gûtem rott /  
 14 Wer zürnet / so es nit ist nott  
 15 Wer vnglück koufft / wer trurt on sach  
 16 Wer lieber krieg hat / dann gemach  
 17 Wer gern sicht mûtwill syner kynd  
 18 Wer halt syn nachbuwr nit zû fründ  
 19 Wer lydet das jn druckt syn schûch  
 20 Vnd jnn syn frow jm wynhuß sûch  
 21 Der ghört wol jnn das narrenbûch  
 22 Wer me verzert dann er gewynnt  
 23 Vnd borget vil so jm zerrynt  
 24 Wer zücht syn frow eym andern vor  
 25 Der ist eyn narr / gouch / esel thor /  
 26 Wer gdenckt die vile / der sünden syn  
 27 Vnd was er drumb muß lyden pyn  
 28 Vnd mag doch frôlich syn dar mitt  
 29 Der gehôret vff den esel nitt  
 30 Sunder der esel vff syn ruck  
 31 Das er jn gantz zû boden truck  
 32 Der ist eyn narr / der sicht das gût  
 33 Vnd noch dem bösen stellen dût  
 34 Hie mitt sint narren vil gerürt  
 35 Die diser esel mitt jm fürt